

於塵土誰爲知者泯滅無疑也迴視埋沒于草萊湮滅無聞者爲何如哉乃作銘曰

子嗟純成幼戴儒冠讀書幾載校藝秋官誓將一舉九萬鵬搏運有定厄世無常安幡然學道秉心如丹長春西迴景星爭觀徒步千里一見相權授以道妙佩服馨蘭苦心修鍊幾換炎寒要遊玉京此事無難三洞寶典灰燼遺殘校讐十稔書始爲完拂衣高蹈雅志林巒卻歸舊隱終老盤桓無何仙去聞者悲酸刻諸琬琰過者詳看當知道中自有鳳鸞

洞觀普濟圓明真人高君道行碑

安西王府文學姚燧撰

道藏輯要

甘水仙源錄

望

翼集三

我元自太祖聖武皇帝視邱長春有道聘爲玄門宗厥後太定憲三宗及今

皇帝皆稟孝自天善繼以述雖長春返真不虛其位命尹清和李真常張誠明王純真與今張玄逸嗣焉而迭居之如邱在太祖世其徒認縣官崇禮斯道之盛語其師之居不敢斥必曰堂下然堂下治京師而祖師之藏與夫成道之廬則在今終南山之劉蔣自堂下視之猶木根而水源必茂浚乎此乃始不憂傳脈之不盛故凡四方走幣堂下爲香火之奉者必割畀而實之祖庭待以興化弘教之須豈惟是爲然惟人亦然苟可以任興化弘教之責亦必擢置祖庭受事之際不令拱手肆志于無用

之地嗚呼才有大細故任有重輕德有著微故居有久近自秦而夏而梁而蜀治轄恆半堂下其任如彼其重也自庚子從洞真入關今茲四十年職道教者獨再紀其居如此其久也則夫爲才之大爲德之著尙待言說而始白之人耶君姓高氏諱道寬字裕之應之懷仁人其世夙豪於財而系則不詳幼業讀書能通大義焉長爲吏長安丁內外艱始棄室爲黃冠師其從受學三人始則安蓬萊淪其源繼則李冲虛大其流終則于洞真會其融而導其歸故遊洞真門最久洞真亦恃君有受而克大其傳也旣告以道德之微言又授上清紫虛之籙賜號圓明子署知重陽萬壽宮及提點甘河遇仙宮歲壬子真常擢爲京兆道藏輯要

甘水仙源錄

望

真集三

又上

道錄者十年中統辛酉誠明薦之朝制以爲提點陝西興元等路道教兼領重陽萬壽宮事至元辛未純真易子爲尊師加知常抱德於圓明之上丙子天后皇子安西王各錫黃金雲羅冠服一被教令又益以西蜀道教猶仍圓明第易知常抱德爲洞觀普濟尊師爲真人以明年丁丑春正月二十有五日上征逆而推之盡金明昌乙卯秋七月十有九日爲闕春秋八十有三而藏冠屨於仙蛻之園云其年五月嗣真人李天樂實狀其行俾道錄郭志祥持示燧曰真人之德宜顯詩之將維子是請也燧曰嗣真人與道錄之言不可辭讓況及先真人風槩之一際乎乃遂詩之其辭曰



緊昔君生應之懷仁後由兵興避走而秦幼知讀書長而試吏  
束於親存供爲子事棘棘時艱風樹悲纏乃斬慈愛一志求仙  
中夜耿光天門啟奧瓊屋磊嵬飛揚葆纛是皆平日積想之爲  
初匪高高善幻爲斯以君達觀能不是覺蓋以自信精神之確  
伊誰云師迺卽安君望粗有見要眇靳聞久之于于東亂沐水  
丹陽之孫冲虛是倚及門不屑示教多方軋以擊摧觀其競疆  
納以濁垢察其茹受積久不移用視持守投畀井曰臧獲所難  
人勉於暫君久益安積信冲虛待日日改作新授付已密有在  
洞真徵車旣牽旣膏庭議具虞翩其避逃乃勅冲虛惘欸相布  
使就其徒擇爲行輔冲虛戒君中使與西曰惟若人丹陽耳提

道藏輯要

甘水仙源錄

一聖

翼集三

又文

穴石吳嶽聞道日躋彼伏鵠卵知求魯鷄子今幸際猶昇有梯  
竟偕洞真自隴而沐趨風後塵聞見再變洞真留主中太一宮  
君遂不去凡焉與同玉步旣改君始北邁結廬德興規以自晦  
洞真逾燕挈徒而東衍教白雪召君來從曰子爲道輕世自足  
偃蹇雲山其過乖物其反子者同塵無猷徵逐府寺其歸附炎  
二者揆道無一而可由先夫人後則忘我安知至人與世幹流  
浚其靈臺與理充周余也誰昔子外之病教之無爲恬澹虛靜  
上而人天性命之原欲子內服玄聖之言子守是說膠轄拘礙  
囿於一小曾未聞大修身有得及物利生鈞之爲德何害並行  
勉出酬應無憚而退若金用礪磨鈍而銳小子識之劬心自荷

君拜稽首受訓不那又從會葬祖師劉蔣關中刳兵所在榜葬白骨陵邱熊虎爲羣作室幾時雄樓切雲後爲終南勝槩之甲君時佐用身任寡之行哀四方言能動頑虛馬與輿出以實還勞則夥矣略而不有鼓鐘于宮譽者盈口洞真亦期可振玄風署知重陽甘河兩宮真常拔之俾錄道教廣員千里實長京兆蝟磔琳宮簡其餘章草靡風行教益奮張誠明奏制提點延慶隴秦山南治轄之廣孰非開府皇子異諸裂地之多古先有無帝曰欽哉汝有河外官惟其能承制自拜乃降教令益之兩川蜀凡道流曰始願焉嘗觀爲治教難政易政恃賞刑民有勸避教以道民孝悌之興難也烏在身先未能矧乎教道難者之又

道藏輯要

甘水仙源錄

四

翼集三  
六二八

如適斷髮鬻鬚求售彼捐彝倫何有於師無賞以誅無刑以隨來則受之去不越逐總總而居從厥攸欲自非其道不令而從孰久不斃賤貴歸心嗟君居此厯逾再紀年八十三墮乎順委冠履安墳仙蛻有園誰其嗣君君有願言旣謂天樂子余所厚匪我私之子蘊之茂畀汝印奩賜服命書子欲不取人疇汝踰高風日邈皇子悼怛卽命天樂從君願託立君之位師君之爲猗哉皇子始終君知北山之石貫古不朽有龜作趺有螭絡首于以樹之清渭之陰刻此銘詩式耀來今

太華真隱樵君傳

安西王府文學姚燧編